

U VESPRU

E lu Francisi cu la so putenza
'n Sicilia facià malacrianza;
lu pani ni livava di la mensa,
Francisi si vidianu ad ogni stanza:
iddi, fidannu nni la so putenza,
e nu', mischini sutta la so lanza;
'ntà un'ura fu distrutta dda simenza,
fu pri tunnina salata la Franza.

'Na vuci pi li strati chi gridava:
-Nun lu sintiti lu Vespriu ca sona?
Ed ognidunu l'armi si pigghiava
E contra lu Francisi nesci fora.
Tuttu lu populu vinnitta gridava;
puru li donni vonnu fari prova;
lu sangu tradituri ognunu abbrama,
pirchè lu sangu l'onuri arrinova.

Sicilia porti la cruna riali,
'ntà la tò testa bedda la teni,
ca si' cchiù ricca di lu stissu mari
e li tò figghi su' tutti guirrerri:
si qualchidunu cci havi a cumannari,
passassi sutta si curaggiu teni:
Sicilia, Sicilia, 'un dubitari,
nuddu ti pistirà sutta li pedi!

Senti la Francia ca sona martòria
La Francia un veni chiù 'n Sicilia!
Viva Sicilia ca porta vittoria,
viva Palermu, fici mirabbillia!
Sunati tutti li campani a gloria,
spinciti tutti l'armi tirribillia,
ca pr' in eternu ristirà a mimoria
ca li Francisi ristarù in Sicilia.